

A *rub*a

A *ntaño*



Poco poco nos folklore y nos cultura ta moviendo pa ser exhibi riba otro suelo cu no ta di nos. Mas bien por ser bisa cu nos ta gusta pasa man pa loke no ta di nos mes hendenan, y nos costum-bernan.

Si no tabata pa e iniciativa di nos amigo Harry Croes cu a bini cu e Festival di Dande, esaki tambe lo a ser poni un banda, talvez pa cualkier payasada yankee o di otro pais cu no tin nada ver-daderamente di nos.

Recientemente tur e atencion tabata pa e Jazz Festival of un Festival di Ranchera, pero danki Dios cu ainda nos ta mantene na bida e deramento di gay esta e Fiesta di San Juan, den diferente dis-trito di Aruba.

Awe cu ya no ta mucho leu for di e fecha di e celebracion di San Juan y e Deramento di Gay, nos kier ilustra den nos grafico di e grupo di Omo Tito durante un deramento di gay cu tabatin como escenario e veld di Rooi Afo.

Hasta un filmacion a ser haci ultimamente cu un script cu ta representa un tanto di e celebracion di e Fiesta di San Juan y e Deramento di Gay, cu manera a yega di ser priminti lo ser exhibi tambe na TeleAruba. Pero no mester lubida cu "bo no por priminti hende pover, ni debe hende rico" pasobra nan lo no laga bo na paz.

Ban spera cu hopi di nos tempo di antes no bay perdi, manera cu ya hopi a keda pa olvido. Pa e fiesta di San Juan unda cu San Juan ta bini y San Juan ta bay, y e homber cu cara mara y e basora den su man ta trata na mata e pover gay dera den tera cu solamente su cabez riba e superficie. Falta solamente awor e dierenbescherm-ing no bini adilanti cu e proteccion di e gay, pasobra e ora ey tambe lo no tin comemento di galiña, ni na soppi, ni den currie, y ni na BBQ.